

汾阳无德禅师语录序

银青光禄大夫行秘书监知汝州军州兼管
内营田堤堰桥道劝农使上柱国南阳郡开国侯
食邑一千九百户杨亿述

昔者白象降生。教兴于权实。青莲视
瞬。义著于师承。厥后只履西归一花东布。
世系联续。开悟寢广。然而根器各异。宗致
迭举。少林之嗣既分皮髓之浅深。大寂之徒
亦著心眉之阶级。虽搅为一呼。匪酥酪醍醐
之殊。然列彼三车。推羊鹿大牛之别。趋觉
城而固有淹速。非智眼而孰克照明。

汾州大中寺。太子禅院长老。释善昭者。本太原人。积习闻薰。孤贞绝俗。自去饰受具。即杖策巡。方所至少留。随机叩发。历参知识。七十一员。最后受印于汝州南院省念。遂法裔念。出风穴沼。沼嗣先南院颢。颢嗣兴化奖。奖嗣临际玄。玄嗣黄檗运。运嗣百丈海。海出马祖。祖出南岳让。让为曹溪嫡子。自曹溪至师。凡十一世。师既投针临汝。分灯摩竭。衣珠内炳。潮音尚秘。薄言湘楚。依止林樾。道俗归慕。名声普闻。长沙守张侯茂宗。以四大寺。命师择居。北抵襄沔。止白马山。郡牧刘公昌言躬诣顶谒延住兰若。前后八请皆不之诺。淳化四年。西河缁素千余人。协心削牍。遣沙门

契聪。诣白马山。迎至其郡。遂尔留憩。摄伽梨而登席。挥犀柄以谈空。毗耶净名宴坐罔离于空室。庐峰慧远送迎不越于虎溪。净众骈臻。法韵雄震。而师愿力勇猛。学解淹博。周游湖岭。探索筌蹄。效遍参于善财。同多闻于庆喜。若乃江西即心之海。而归于无物。石头全提之句。而谓之真吼。南泉掉阖而自得。引发上机。赵州纵夺。而有端摧伏异见。洞山之建立五位。回互以彰。仰山之分列诸势。游戏无碍。雪峰应接之眼。啐啄同时。云门扬擢之言。药石苦口。咸达其要。悉举其纲。至如大用现前。纤尘不立。诸法皆泯。四句迥超。盖有黄檗之迅机临际之妙脉。三玄三要。在掌握之所施。二主二

宾。与盲瞶而何异。是为正路。直造上乘。
师之所证。逾于格量。非齐肩于佛慧。曷染
指于禅味哉。予剝心弥久感疾无损。静虑冥
默。世缘纷染。守郡楚北。恪居官次。而师
遐遣清侣。躬裁尺讯。谓广内集录。载师之
辞句。既参于刊缀。汝海答问。陪师之法
属。且联其宗派。邈同风于千里。遽授书之
一编法兴智深。二上人飞锡。实勤巽床甚
谨。述邑子之意。愿永南宗之旨属。图镂版
邈求冠篇。赏音相从。重胝忘苦。幸烦襟之
微释。因濡翰以塞请云尔。